

Nua che las bands svizras naschan...

■ (rtr) Sin la plattform da musica svizra Mx3.ch datti dapreschent passa 24 000 bands. Pia in stgazi da datas davart la cuntrada da musica svizra.

SRF Data ha evaluà questas datas e preschentà invistas interessantas en la scena dals uschenumnads «newcomers». En cifras absolutas èsi il chantun Turitg cun passa 3000 bands. Quai suandà dals chantuns Berna, Vad e Geneva. Sch'ins resguarda però er il dumber da la populaziun, lura mida quai. Lura èsi ils chantuns Basilea-Citad e Geneva che mainan cun trais enfin quatter bands pro 1000 abitants. In plaschair per *Tobit Schäfer*, manader da l'uniun per la promoziun da rock en la regiun Basilea, e deputà socialdemocrat en il cussegel grond. El relativescha però: «Bleras bands inditgeschan mo ch'i vegnian da la citad.» Questas sperian uschia da crear atenziun tar la scena culturala locala. Perquai è Schäfer surprais ch'il chantun vischin, Basilea-Champagna, haja tenor Mx3.ch uschè paucas bands pro 1000 abitants. Là dettia quai numnadain bleras furmaziuns da rock e hip-hop. En la Svizra dal vest ed en il Tessin datti era

bleras bands. Auter però en la Svizra centrala: En il chantun Uri datti per exempel stgars ina band pro 1000 abitants. Tenor l'evaluaziun dad SRF Data datti dapli bands là nua che promoziun da cultura è pli auta. Tant Basilea-Citad sco era Geneva dattan en egl perquai ch'els han autas expensas per la cultura. Cunquei che omadus sajan chantuns e gist citads saja quai però grev da cumparegliar quels cun tut tshels chantuns. En la scena da las bands novas datti cler dapli bands da rock. Populars èn però er auters genres sco pop e hip-hop. Las datas dad Mx3.ch sajan però surtut adattadas per il genre da pop. Las pli bleras bands inditgeschian da vulair cumparair en il radio. Auters genres – sco per exempel il jazz – na sajan betg represchentads uschè bain, di Schäfer. Fazit: Il success da tshertas bands na pon ins betg attribuir sulet a la promoziun da cultura da tsherts chantuns ubain tshertas citads. Ils experts na pon betg confermar questa pretensiun. Cler è tenor *Dabu Bucher* da Dabu Fantastic però: Bleras – sche betg las pli bleras – bands svizras dependan da daners da promoziun.